

# Dumagnà la matura – ed ussa?

Suenter dudesch onns da scola finescha ina èra cun la matura. Ma co vinavant? Ir directamain a studegiar u far insatge cumplet auter ch'ir a scola? La FMR ha dumandà plirs/as maturands/as tge plans ch'els/ellas han per il futur e sche quels èn sa midads pervia da la pandemia.

LAURA SCHÜTZ/FMR

## Luana Bearth da Cuira (Scola chantunala grischuna):

«Jau ma sun decidida da far in onn intermediar e suenter pli probabel ir a studegiar. Quai per il motiv che jau na ma sun anc betg dal tut segira tge che jau vi far ina giada professionalmain. Ul-



Luana Bearth

tra da quai vuleva jau ina giada avair temp per mai mezza, per far quai che jau vuleva gia adina far ina giada. Il mument lavur jau en il kino a Cuira, pli tard gress jau gugent sin viadi sche la situaziun da corona lubescha. Jau n'hai betg ex-nun l'impressiun d'avair manchentà insatge pervia da la pandemia. Cler n'è ins betg uschè libers pervia da corona, ma jau crai ch'ins haja mintgamai chattà bunas soluziuns, per exempel per il viadi da matura, e fatg persuenter autras experientschas.»

## Simona Beeli da Lohn (Scola chantunala grischuna):

«Jau vom a la Scola auta da pedagogia a Cuira per daventar scolasta da la primara. Jau lavur gugent



Simona Beeli

cun uffants pli pitschens ch'èn motivads d'emprender. Ir en l'ester fiss eventualmain era stà in'opziun per mai, pervia da la pandemia n'è quai però betg vegnì en dumonda. Forsa sa datti insacura pli tard la pussaivladad da far in onn intermediar. Jau hai bain l'impressiun che bler è cru-

dà davent pervia da la pandemia, gist ussa cura ch'ins è daventà maioren ed avess dapli pussaivladads. Tuttina hai jau adina chattà bunas alternativas co passentar il temp liber.»

## Sabrina Venzin da Mustér (Gimnasi da la claustra da Mustér):

«Atgnamain vuleva jau studegiar medischina, lura sun jau dentant vegnida casualmain attenta al studi da scienzas da nutriment a la Scola politecnica federala a Turitg. Jau al chat interessant cun-



Sabrina Venzin

quai ch'il studi tracta differents roms en ina, sco chemia, biologia e fisica. Jau vuleva directamain cumenzar a studegiar per betg perder temp, per cas ch'il studi na ma plaschess tuttina betg e perquai ch'ir sin viadi na fiss betg stà il medem cun corona. La sortida ma manca bain, ma jau chat ch'ins s'endisia a la situaziun. Jau ma sprov da restar positiva.»

## Robin Holdener da Sagogn (Gimnasi da la claustra da Mustér):

«Il mument fatsch jau in praticum tar «Cavigelli Ingenieure AG» a Glion. Là hai jau la chaschun da collavurar tar in project ch'è vegnì realisà sin incumbensa dal chantun. Il schaner cumenz jau cun il servetsch militar, ch'è il motiv pertge che



Robin Holdener

jau fatg in onn tranteren. L'atun 2022 vom jau a la Scola politecnica federala a Turitg per studegiar «scienzas da l'inschigneria relativs al spazi».

Quest studi correspunda era a mia lavur durant il praticum: I va per analizar e planisar nos spazi da viver. Corona n'ha betg influenzà mes plans dal futur, però ils contacts socials. Cunzunt il sunar da cuminanza m'ha mancà.»

## Romedi Parolini da Scuol (Scola chantunala grischuna):

«Jau sun gist en il servetsch militar sco infanarist. L'emprim fatsch jau la scola da recrut fin il november, suenter suonda il temp da militar en servetsch lung. Jau frequent pia l'entir servetsch militar en ina per esser suenter liber. Avant da cumenzar a studegiar fasschess jau gugent anc in praticum. Jau ma pudess imaginar da studegiar insatge en direc-



Romedi Parolini

ziun economia u inschigneria. Mes avegnir n'è betg sa midà pervia da la pandemia, jau sun dentant led che jau poss en il fratemp puspè ir a chassa la fin d'emna durant il servetsch militar.»

## Till Luzio da Savognin (Scola chantunala grischuna):

«Fin il november fatsch jau la scola da recrut. Per mai era uss gist in bun temp da far il servetsch militar per che quel saja frequentà e per che jau haja anc in zic temp da ponderar tge che jau vi far il futur. Suenter il militar lavurass jau gugent sco scolast d'aissa durant l'envern e gress suenter sche pussaivel a viagiare. Areguard studegiar m'interess jau il mument cunzunt per relaziuns internaziunalas. Corona n'ha betg g'ina gronda influenza pertutgant mes plans dal futur.»

